

Kapítulo 5

KREDU DI MORMONISMO

Kiko e iglesia mormon ta siña? Promé ku nos studia nan doktrinan na plaka chikí, lo ta bon pa haña un bista general di nan kredo un dokumento prepará pa José Smith:

E ARTIKULONAN DI FE

di e Iglesia di Hesukristo di e
Santunan di e Deláster Dianan

1. Nos ta kere den Dios, e Tata etèrno, i den Su Yu, Hesukristo, i den Spiritu Santu.
2. Nos ta kere ku hende lo haña kastigu pa nan propio pikánan, i no pa Adam su transgreshon.
3. Nos ta kere ku pa medio di e propisiasion di Kristo, ku tur hende por ta salbá, pa medio di obedensia na e leinan i ordenansanan di e evangelio.
4. Nos ta kere ku e promé prinsipionan i ordenansanan di e evangelio ta: promé, fe den Señor Hesukristo; di dos, arepintimentu; di tres, boutismo pa kita piká pa medio di inmershon (batisá dor di bai bou di awa); di kuater, ponementu di man pa risibí e don di Spiritu Santu.
5. Nos ta kere ku un hende mester wòrdu yamá pa Dios, pa medio di profesia, i pa medio di ponementu di man, dor di esnan ku tin puesto di outoridat, pa prediká e evangelio i pa atministrá e ordenansanan di esei.
6. Nos ta kere den e mésun organisashon ku a eksistí den e iglesia tempran, esta, apòstelnan, profetanan, pastornan, siñadornan, evangelistanan, èts.
7. Nos ta kere den e don di lenganan, profesia, revelashon, vishonnan, kuramentu, interpretashon di lenganan, èts.
8. Nos ta kere ku Beibel ta palabra di Dios basta ku e ta tradusí korekto; nos ta kere tambe ku e *Buki di Mormon* ta palabra di Dios.
9. Nos ta kere tur loke Dios a revelá, tur loke E ta revelá, i nos ta kere ku lo E revelá hopi kos grandi i importante tokante e reino di Dios.
10. Nos ta kere den e reunifikashon literal di Israel i den e restorashon di e dies tribunan; ku Sion (e Herusalèm Nobo) lo wòrdu

konstruí na e kontinente di Merka; ku Kristo lo reina personalmente riba mundu; i, ku mundu lo ta renobá i lo risibí su gloria di paraiso.

11. Nos ta tuma pa nos mes e privilegio di adorá Dios todopoderoso segun nos propio konsenshi ta manda, i ta pèrmití tur hende e mésun privilegio, pa adorá kon, unda, i kiko ku nan ke.

12. Nos ta kere ku ta nos deber di someté na reinan, presidentenan, gobernantenan, i mandatarionan, i pa obedesé, onra, i mantené e lei.

13. Nos ta kere (ku ta importante pa ta) onesto, bèrdat, puru, generoso, virtuoso, i pa hasi bon na tur hende; di bèrdat, nos por bisa ku nos ta sigui e spièrtamentu di Pablo—nos ta kere tur kos, nos ta spera tur kos, nos ta soportá hopi kos, i ta spera ku nos por soportá tur kos. Si tin kualke kos virtuoso, agradabel, òf di bon fama òf digno di elogio, nos ta buska e kosnan aki.

Ta importante pa paga bon tino na tantu loke un kredu ta bisa, komo loke e no ta bisa. Hopi persona ta gañá pa un kredu ku mirá ariba ariba ta parse bíbliko. Pero si nan a paga mihó tino nan lo tabata mas kouteloso i lo por a mira eror.

Un otro faktor ku tin ku tene na kuenta ora nos ta studia doktrina di un sekta ta ku tin ora nan siñansa bèrdadero ta kontradisí loke nan ta bisa ta nan dòktrína na promé instansia. Nan ta duna impreshon ku nan ta kere un kos, i kaba no ta asina. Den e siguiente kapítulonon nos lo studia algun siñansa mormon mas djaserka.

Un difikultat ku e outor a eksperensí den e estudio aki ta ku doktrina mormon a kambia hopi durante nan historia. José Smith mes a kambia di opinion vários biaha. Tin bes nan bukinan "sagrado" ta kontradisí otro. Pues tin ora ta difísil pa sa presis kiko nan kreensia ta.